



Casteddusardu. VIII Cunferèntzia Regionale de sa limba sarda

de Domitilla MANNU

“Amus fatu unu surcu e non si podet prus torrare in segus, chie si siat chi bincat sas eletziones”. Custas paràulas las at naradas cun fortza, Sergio Milia, assessore regionale a sa cultura, chenàbura 10 de ghenargiu, in sa sala de sas cunferèntzias de su Casteddu de sos Dorias in Casteddusardu, in sa VIII Cunferèntzia regionale de sa Limba Sarda. De seguru non si podet dennegare chi si siet traballadu in custos urtimos degh’annos a proe de sa limba sarda, mancari non totus reconnoscant chi su traballu siet istadu profetosu. “Amus traballadu meda ma si podet fàghere de prus e fintzas mègius” at sighidu a nàrrere Milia. Un’arrejonu, de seguru, bene sestadu, cussu de s’assessore. In sa matessi manera, de tonu e sustàntzia, at sighidu su presidente de sa regione



Cappellacci chi at nadu cosas de importu a proe de sa limba sarda e at fatu prommissas mannas a beru. Cuntzetos e propostas chi, totu sos chi ant a coro sa limba sarda est difitzile chi non los potant cumpartire. A prima pesada at nadu: "Dare dignidade a sa Limba Sarda cheret nàrrere a la cussiderare normale, una limba moderna de impreare in totue". Beru! Semus de acordu! Pro sighire su traballu comintzadu e lòmperu a s'intentu, at inditadu sas atziones netzessàrias: mantènnere sos finantziamentos a proe de sa politica linguistica. Mandare a dae in antis sa modìfica costitutzionale de s'istatutu sardu pro lòmperu a sa coufizzialidade italianu-sardu. Istantziare resursas pro sas àteras limbis faeddadas in Sardigna, cadalanu de s'Alighera, turritanu, gadduresu e tabarchinu. Otènnere s'imparu de su sardu in oràriu curriculare in sas iscolas sustengende sa formatzione de sos mastros e professores e àteru meda. Sa prima die de sa Cunferèntzia, moderada dae Pàulu Pillonca, est sighida cun sos interventos de sos reladores; Antoni Natziu Garau, operadore de s'isportellu linguisticu de Aristanis e Fabritziu Detori in rapresentàntzia de sa minoria tataresa ant faeddadu de su rolu de sa fàmilia in s'imparu de sa limba. De su tema, artes ant faeddadu Teresa Soro, de sa Cumpagnia Teatru Tàtari, chi at propostu s'istitutzione de una Cumpagnia de teatru istàbile in sardu, chi diat pòdere àere sa sede puru in Tàtari; Bustianu Pilosu, presidente de s'Assòtziu regionale Tenore e Clara Farina chi at cantadu e resadu, cun passione, poesias de poetas mannos de eris e de oe. Antoni Deiara, dotzente de mùsica e Nàtziu Perra, professore de cu Cunservatòriu de Casteddu, ant relatadu de mùsica. Piero Marras, agradessidu meda dae su pùbblicu, Maria Giovanna Cherchi, e su Coro de Casteddusardu, chi at donadu mamentos de ammajù cun paritzos càntigos. Sa segunda die, ant abbertu sos traballos Juvanna Tuffu e Micheli Ladu, operadores de s'isportellu linguisticu regionale. Pro sa literadura ant tentu sas relatas, pretziadas meda: Giuseppe Tiroto, iscritore e poete; Antoni Canalis, segretàriu de su Prèmiu de Literadura sarda Otieri, e Anna Cristina Serra, poetissa, chi intre totu sas cosas interessantes naradas, at contadu de una isperièntzia sua in Ispagna, impare cun sos poetas cadalanos. Su professore, Antonello Sassu at faeddadu de iscola. Su Coro Gavino Gabriel de Tèmpiu at incantadu su pùbblicu cun sos càntigos de su repertòriu issoro. Làstima chi pro su dibàtidu non bi siat abbarradu bastante tempus, comente deghiat e disigiaiant sos presentes. Est tocadu a Pepe Corongiu, responsàbile de su servìtziu de s'Ufitziu regionale de sa limba sarda a tancare s'addòviu, faghende unos cantos cussideros subra a su traballu de s'Ufitziu limba sarda e torrende gràtzias a totus. Non si podet dennegare e nen cuare chi custa VIII Cunferèntzia non est istada agradessida, comente àteras bortas, dae pessones meda, fortzis pro more de sas eletziones imbenientes, chi ant dadu a sa manifestatzione àteros sinnificos.

Tàtari, 13/1/2014